

## A Ningnigo na Pas ane Pol tetek e Timoti

### *A warwara talapor nigo*

A pas ne a ningnigo na pas ane Pol, tetek e Timoti. E Timoti mito na papar Esia. E tana a hane Juda pa e tamana a te Grik. Ning e Pol i han ana nuna areur a tinan, i aslang pas e Timoti sur diar armuri pa diar titol taum (oro i Aposel 16:1-3). Lamur e Pol i aslang pas e Timoti sur ir tena tai alar ana lotu to e Epeses.

Te na pas ne, e Pol i atai e Timoti mang ir tai alar a lotu kusun a asasongo na tena asaerla, sakana lar alaulau a tortorot anuna taraila. I atai i otleng ana wakak a asaer, pa i atai i ana si na ngas a taraila dir aslang pas la sur lar tena titol ana lotu, pa ana wakak a toltol ning ir muri.

### **A tinan ana Ningnigo na Buk Timoti:**

A kamkama buk ne (1:1-2)

E Timoti ir sairas a asasongo na asaerla  
(1:3-20)

A ngas ana lotu (2:1-15)

A ningnigola ana lotu (3:1-16)

E Timoti ir tai alari, sur ir hanot a wakak a tena titol (4:1-16)

A asaer tetek e Timoti ana nuna titol  
(5:1–6:21)

<sup>1</sup> Iau e Pol, ning e God pa e Karisito Iesu dia sune iau sur ar aposel ane Karisito Iesu. E God

anundala Tena Alaun pa e Karisito Iesu, esaning dala harnanai suri ana tortorot.

<sup>2</sup> A tumus a pas ne tetek u Timoti, a natuklik momol ana tortorot. A marmaris, a wakak a toltol pa balmolmol ta e God, a Tamandala, pa e Karisito Iesu anundala Leklek, ir kes taum hom.

*E Timoti ir sairas a asasongo na asaerla*

<sup>3</sup> Onone a arakrakai u kale sur ur kes ot ting e Epeses, larning a atong tari tam ning a han utumo e Masedonia. Ur kes sur ur sairas la ning la asaer a taraila anal asasongo na asaer.

<sup>4</sup> Pa gong la molot ana asaerla oros ka, pa ana ususrai ana mangis a tarai, ning bel ta araropna. I tol otnan ka a arlak, pa bel i arnangai ana titol ane God. A titol ane God i gomo ka ana tortorot.

<sup>5</sup> A atongi manglarning, sur a marmaris ir itna artalai na arpotor indala. A marmaris ning i han miting na totoh na balandala, pa nuknukindala ning bel ta rongo na mata e God, pa tortorot momol.

<sup>6</sup> Dingla na tarai la ka han masik kusun a wakak a toltol ne, pa la mur kama a warwara orosla.

<sup>7</sup> La mang sur lar asaer a taraila ana Warkuraila ane God, ika bel la tasman asaning la warwara onoi, pa kamkama warwara ning la nuki mang la tastasman onoi.

<sup>8</sup> Dala tasmani mang a Warkuraila la wakak, ning tik ir titol wakak onoi.

<sup>9</sup> Dala tasmani mang a Warkuraila bel di sarani sur a tena tostos. Di sarani ka sur a ngas a

taraila mange: la ning la kutus warkurai, a tabun longorla, la ning bel la lotu tetek e God, a tena tol laulaula, la ning bel la mur a nuknuk e God, la ning la mur a toltol mite na rakrakan hanua, la ning la umkol a taraila, pa la ning la umkol na tamtamanla pa na kabatnanla,

<sup>10</sup> la ning la tol a pamuk a toltol, a taraila ning la taulai ulak ka a taraila, la ning la tong akes pas a taraila sur lar siuran la, a tena asasongola, la ning la lele asasongo, pa la rop ning la tol a ututnala ning bel i arlar ana tostos a asaer ane God.

<sup>11</sup> A tostos a asaer i kes ana Wakak a Warwara, ning e God i saran tari tak sur ar atatai onoi. A Wakak a Warwara ne ane God, a God na matatar, esaning i angis tikin.

### *A warwara gasgas ana marmaris ane God*

<sup>12</sup> A atong wakak tetek e Karisito Iesu anundala Leklek, esaning i tortorot hok pa i saran tar a rakrakai tak, pa i aslang pas iau sur ar titol teteki.

<sup>13</sup> Nating a sira atong laulau e Iesu, a alaulau a taraila ning la tortorot pa akadik la. Ika e God i maris iau, anasa bel a tasman a utna ning a toli, pa belot a tortorot.

<sup>14</sup> Anundala Leklek i pek anuna tnan marmaris hok, pa i tabar iau ana tortorot pa ginina ning ar mang sur a tarai. A artabar ne i kamkamna oe Karisito Iesu.

<sup>15</sup> E Karisito Iesu i han purum ute na rakrakan hanua sur ir alaun a tena laulaula. A warwara

ne i momol kol, pa dalar tortorot onoi. Pa iau, a laulau kol tana tena laulaula rop.

<sup>16</sup> Ika e God i maris iau, sur e Karisito Iesu ir asangan anuna wowon a toltol tetek iau, ning i alaun pas iau pa i kepsen anuk a toltol laulaula. Pa i tol a toltol ne hok, sur a taraila otleng lar oroi pa lar tortorot ono, pa lar kibas a lalaun tikin.

<sup>17</sup> Dalar hanrawai a King ning i laun tikin, pa dalar atong aleklek pasi. Esaning bel dala oroi, pa i ka e God. A aleklek ne bel ir rarop. Amen.

<sup>18</sup> E Timoti a natuklik, a asaerla ne a sarani tam, i arlar ana warwara na propet ning di ka atong tari hom ning la araring sur u. Ning ur mur a asaerla ne, u ning a wakak a tena harum ana Wakak a Warwara.

<sup>19</sup> Ur tur rakrakai ana num a tortorot, pa ur mur a nuknukim ning bel ta rongo na matana e God. Dingla na tarai bel la toli larne, pa anunla tortorot i hirua arlar ana sip ning a top i dapis regen seni pa i murung.

<sup>20</sup> E Himeneus pa e Aleksanda naur a halinla, ning ia ka saran tar diau na kuna e Satan, sur diar tasmani mang gong ulak ma dia atong laulau e God.

## 2

### *A asaer ana ngas ana lotu*

<sup>1</sup> A ningnigo na utna, a mang sur a tarai a lotu lar araring, lar araring sur a utna ning la kapan suri, lar araring sur a taraila masak, pa lar

araring sur a atong wakak tetek e God. Mulor araring larning sur a taraila rop,

<sup>2</sup> a kingla pa ningnigola rop, sur dalar kes longoroi ana balmolmol, ana totoh na lalaun pa a toltol ning e God i mang suri.

<sup>3</sup> Ning mulor toli larne, ir wakak kol pa e God anundala Tena Alaun ir gas ono.

<sup>4</sup> I mang sur ir alaun a taraila rop, pa lar tasman a momolna.

<sup>5</sup> Anasa takai sot ka a God, pa takai ka otleng ning i dat taum e God pa a taraila, a barsan ning, e Karisito Iesu,

<sup>6</sup> ning i saran tar anuna lalaun sur ir lou alangolango a taraila rop. Ana taim ning e God ka kubus tari, e Iesu i amomol tar a nuknuk e God mang, i mang sur ir alaun a taraila rop.

<sup>7</sup> Ine a kamna ning e God i aslang pas iau sur ar aposel par warawai ana Wakak a Warwara tetek a taraila ning bel na tarai Juda, pa ar asaer la ana tortorot momol. A atong momoli, bel a asongo.

<sup>8</sup> A mang sur a barsanla ting na hananuala rop, lar totoh pa lar tuslan a kunla usaot pa lar araring, pa gong la balakut pa gong la arlak.

<sup>9</sup> A mang otleng sur a gurarala lar mermer ana kaen ning i sot ana minmar anuna gurarala. Lar mermer ana minmar i apuasa a hanrawai pa wakak a nuknuk. Gong la iris a hihinla, gong la mermer ana wan a rakai ning di toli ana gol o ning a matana i abit, pa gong otleng la mermer ana kaen ning a matana i abit.

<sup>10</sup> A gurarala ning la atongi mang la lotu tetek e God, lar mermer ana wakak a titol.

<sup>11</sup> Ning a gurarala lar kibas a asaer ting na Buk Tabu, i wakak ning lar kes wowon pa lar anatarna la.

<sup>12</sup> Bel a noren tar ta hane sur ir asaer ta barsan o ir nigon ta barsan. I wakak sur ir kes wowon ka.

<sup>13</sup> Anasa e God i akes nigon ot e Adam pa lamur e Iwa.

<sup>14</sup> Pa bel e Adam ning e Satan i asongo i. E Iwa ning e Satan i asongo i, pa i punga ana toltol laulau.

<sup>15</sup> Dir alaun a gurarala anasa ana agon. Dir alaun la ning la tur rakrakai ana tortorot, a marmaris, pa totoh a toltol taum ana toltol ning i sot sur lar muri.

### 3

#### *A ningnigola ana lotu*

<sup>1</sup> A warwara ne i momol kol, mang: Ning tik i mang sur ir ningnigo ana lotu, a wakak a titol ning i mang suri.

<sup>2</sup> Pa ning tik i mang sur ir ningnigo ana lotu i wakak sur a ginina ir manglarne: gong ta artituu i kes onoi, ir taulai ka takai a hane, ir tai alar anuna lalaun, ir warkurai tostos anuna lalaun, i a ngas a barsan ning a tarai la hanrawai i, ir sira gas pas a tarai uting na nuna rumai, pa i a wakak a tena asaer.

---

**2:10: 2:10** 1 Timoti 5:10    **2:12: 2:12** 1 Korin 14:34    **2:13: 2:13**  
 Stat 2:7, 21-22; 1 Korin 11:8-9    **2:14: 2:14** 2 Korin 11:3; Galesia  
 3:1-6    **3:1: 3:1** Aposel 20:28    **3:2: 3:2** Taitus 1:6-9

<sup>3</sup> Pa gong a tena gang, gong a tena harum, ir tena balmolmol, gong i arlak, pa gong i mang kol sur a mani.

<sup>4</sup> I a wakak a ningnigo ana keskes anun latamana, pa i asaer a natnatna sur lar hanrawai i pa lar longor teteki.

<sup>5</sup> Esining bel i lasan sur ir nigo wakak a keskes anun latamana, bel ir tolsot pasi sur ir tai alar a tarai a lotu ane God.

<sup>6</sup> Ning ta barsan, ono kane i lingir tar a nuknukna, gong i ningnigo ana lotu, sakana ir rakan alekleki pa ir punga ana warkurai arlar oe Satan.

<sup>7</sup> A ningnigo ana lotu a ngas a barsan ning a tarai masik otleng ning bel la lotlotu, la hanrawai i. Ning bel, lar atong kumnani, pa ir hirua ana kun ane Satan.

### *Na tena arnangai ana lotu*

<sup>8</sup> Mang otleng larning tetek na tena arnangai ana lotu, i wakak sur la a ngas a barsan ning a tarai la hanrawai la, lar momol ana nunla warwara, gong la gang pa gong la mang sur a galis a mani.

<sup>9</sup> Lar tong akes a tortorot momol taum ana nuknukinla ning bel ta rongo na mata e God.

<sup>10</sup> Dir toho nigon tar la, pa ning a gininla i wakak, lar kibas bot a titol na tena arnangai ting na lotu.

<sup>11</sup> Tetek anunla na gurarala otleng ir manglarning, la a ngas a gurarala ning a tarai la hanrawai la, gong la warwara kumkumna, lar

tai alar wakak anunla lalaun, pa lar momol ana titolla rop.

<sup>12</sup> A tena arnangai ana lotu ir taulai ka takai hane, pa ir nigon wakak na natnatna, pa la rop ting na nuna rumai.

<sup>13</sup> La ning la titol wakak ana titol na tena arnangai ana lotu, lar kibas a hanrawai anuna tarai tetek la. Pa lar warwara talapor ana nunla tortorot oe Karisito Iesu pa bel lar matmataut.

### *Anundala tortorot*

<sup>14</sup> A mang ar hanot kapit tetek u, ika ar tumtumus nigo tetek u.

<sup>15</sup> Pa ning bel ar hanot kapit, u ka tasman a toltol ning a tarai ane God lar toli na arpotor inla. A tarai a lotu ane God esaning i laun, la arlar ana pos pa kama rumai ning la arakrakai a momolna.

<sup>16</sup> Dala tasman momoli mang, a asaer ning dala tortorot onoi i itna kol. Larne:  
 E Karisito i hanot a barsan,  
 a Talngan Tabu i apuasa i mang e Karisito i  
 tostos na matana e God,  
 a angelola la oroi,  
 di atatai onoi pa warwara ne i han sarara tetek a  
 tarai miting na matanitula rop,  
 pa galis te na rakrakan hanua la tortorot onoi,  
 i han kas pa i kes ana matatar saot na langit.

## 4

### *A asasongo na tena asaerla*

<sup>1</sup> A Talngan Tabu i apuasa i mang al tarai lar han masuk kusun a momol a tortorot ana ararop a pukakiarla, pa lar mur a ingunla ning la asasongo, pa lar mur a asaerla anuna motla.

<sup>2</sup> A asaerla ne i hanot miting tana tena asasongola, a tarai ning bel la oroi lalan a tostosna pa laulauna, anasa a tostos a nuknukinla ka mat.

<sup>3</sup> A ngas a tarai ne, la sairas a tinaulai pa la sairas a tarai sur gong la ien al ngas a utna na hangan. A utna na hangan ning, e God i akes tari, sur a tarai a tortorot ning la tasman a momolna, lar atong wakak tetek e God onoi pa lar ieni.

<sup>4</sup> Anasa a ututnala rop ning e God i akes tar la, la wakak, pa gong dala bilbilor la. Dalar atong wakak tetek e God onoi ning dalar ieni.

<sup>5</sup> Anasa a warwara ane God pa niaring dia awakak a utna na hangan sur ir wakak na matana e God.

### *A wakak a tena titol ane Karisito*

<sup>6</sup> Ning ur asaer na tastasimla ana asaer ne, u a wakak a tena titol ane Karisito Iesu, ning u ka alasan wakak pas u ana tortorot momol pa wakak a asaer ning u muri.

<sup>7</sup> Ur han masuk kusun a asaer orosla ning bel i to pas al utna. Ur alasan u sur ur gomo ana ngas a lalaun ning e God i mang suri.

<sup>8</sup> Ning dala alasan a palaondala ana ngas a urmatana mon, i nangan a palaondala, ika ning dala alasan dala sur dalar gomo ana toltol ning e

God i mang suri, i wakak kol tana ututnala rop. I nangan a lalaun ne pa a lalaun lamur otleng.

<sup>9</sup> A warwara ne a atongi, i momol kol, i wakak ning dalar muri pa dalar tortorot onoi.

<sup>10</sup> Ine a kamkamna ning mila rakrakai pa mila titol rakrakai, anasa mila harnanai ana tortorot oe God, esaning i laun pa i sira alaun anuna taraila rop, ning la tortorot onoi.

<sup>11</sup> Ur asaer la pa ur arakrakai la ana ututnala ne.

<sup>12</sup> Gong u noren tik ir oroi purpurum u anasa u barman. Ur tol a wakak a toltol tetek a tena tortorotla ana num a warwara, anum a toltol, anum a marmaris, anum a tortorot pa anum a totoh a lalaun, sur lar muri.

<sup>13</sup> Ur rakrakai ana wawas ting na Buk Tabu tetek a tarai a lotu, ur rakrakai ana warawai taum ana asaerla tetek la, tuk ning ar hanot.

<sup>14</sup> Gong u noren a artabar ana Talngan Tabu, ning di saran tari tetek u, ning a ningnigola la warwara na propet pa la suah tar a kunla saot hom.

<sup>15</sup> Ur titol rakrakai ana ututnala ne. Ur saran anum a lalaun sur a ututnala ne, sur a taraila rop lar oroi u mang u gomo ana lalaun ning e God i mang suri.

<sup>16</sup> Ur tai alar anum a lalaun pa anum a asaer, ur tur rakrakai ondiau. Anasa, ning ur toli larne, ur alaun pas u ot, pa la otleng ning la longor u.

## 5

### *A arnangai tetek a laola*

---

**4:10: 4:10** 1 Timoti 2:3-4  
2 Timoti 1:6

**4:12: 4:12** Taitus 2:15

**4:14: 4:14**

<sup>1</sup> Ning ur atostos ta barsan ning di agon nigoni tam, gong u warwara na balakut, ur warwara molmol ka larning u toli tetek e tamam. Ur toli tetek a barmanla, larning u toli tetek na tastasim.

<sup>2</sup> Pa tetek a gurarala ning di agon nigon la tam, ur toli tetek la larning u toli tetek e tnam. Pa tetek a basbasla, ur toli tetek la larning u toli tetek na tastasim hane, ana totoh a toltol.

<sup>3</sup> Ur nangan a laola ning bel tik i tai alar la.

<sup>4</sup> Ika, ning ta lao na natnatna o na tumtubuna kaning, i wakak ning lar atalapor nigon anunla tortorot ana arnangai tetek anunla tarai, sur lar keles a marmaris ane tamanla pa e kaba tnanla pa na tumtubunla. Ning lar toli larne, e God ir gas.

<sup>5</sup> A lao ning i sot ka i kes pa bel tik i tai alari, i tortorot ka sur e God ir nangani. I rakrakai ana lotu pa niaring, ana moromla pa a kabakiarla, sur e God ir nangani.

<sup>6</sup> Ika, a lao ning i mang sur ir gas oros ka, ning kaning ot i laun, a inguna ka mat.

<sup>7</sup> Ur asaer a tarai ana asaerla ne, sur gong ta artitiu i kibas la.

<sup>8</sup> Ning tik bel i nangan a mainala, pa la otleng ting na nuna rumai, ka han masik kusun a tortorot. Esaning i laulau kol tana tarai ning bel la tortorot.

<sup>9</sup> Gong u tumus akes a risana laola ning belot i diono na bonot a rau anunla sur a tarai a lotu lar nangan la. Lar nangan ka a ngas a hane ning i taulai ka takai a barsan,

<sup>10</sup> pa taraila rop la tasman anuna wakak a titolla, larning i lawat wakak a kakakla, pa i sira

gas pas a tarai ting na nuna rumai, pa i gos sen a kubus kusun a hana tarai ane God, \* pa i nangan a tarai ning a mamahatla i kibas la, pa i saran tar anuna lalaun sur ir tol a urmatana wakak a titol.

<sup>11</sup> Pa a laola ning la rakrakai ot, gong u tumus akes a risanla. Anasa, ning a nuknuk a tinaulai ir hanot, lar han masuk kusun e Karisito.

<sup>12</sup> Pa warkurai ane God ir kibas la, anasa la kutus anunla ningnigo na lele tetek e Karisito.

<sup>13</sup> Bel i kane, la sira palaona ngorongoro pa lar sira arop pukakiar ana han taltal ting na tamanla, pa ning a utna ning la laulau onoi la na tena warwara kumkumna, la sira subaran oros la ana utna ning bel anunla, pa la sira atong a warwarala ning bel i wakak sur lar atongi.

<sup>14</sup> A mang sur a laola ning la rakrakai ot, lar taulai ulak, lar agon ulak, pa lar tai alar anunla rumaila, sur gong la tol ta utna ning anundala hiruala lar atong laulau dala onoi.

<sup>15</sup> Dingla na lao la ka han masuk pa la ka mur e Satan.

<sup>16</sup> Ning ta hane a tena tortorot, pa ta halna a lao, i wakak sur ir nangani, sur gong a tarai a lotu la molot onoi. A tarai a lotu lar molot ka onla ning bel tik i nangan la.

### *A atumarang tetek a ningnigola ana lotu*

<sup>17</sup> I wakak ning a ningnigola ana lotu ning la titol wakak ana titol, dir saran a hanrawai pa a wakak a arlou tetek la. Dir toli larne tetek la ning la titol rakrakai ana warawai pa asaer.

---

\* **5:10: 5:10** A toltol anuna tarai Juda, ning al wasira la kas, pa hanla i kubus, a tena titol ir gosi ana malum. **5:13: 5:13** 2 Tesalonika 3:11 **5:14: 5:14** 1 Korin 7:9

18 Anasa a Buk Tabu i atongi mange, “Gong u dot alar a pahana bulumakau ning i pas gingini a wit, i otleng ir hangan ot.” *Lo 25:4*

Pa i atongi otleng mange, “I tostos sur a tena titol ir kibas ot anuna arlou.” *Luk 10:7*

19 Gong u longor tar ta artitiu ana ta ningnigo ning takai ka i atai i. Ning naur o ir natol ditol ar tiwi, ur longor a artitiu ning.

20 Ning ta ningnigo ir tol a toltol laulau, ur atostosi na matana tarai a lotula rop, sur a atumarang tetek al tarai otleng onla.

21 A warwara rakrakai tetek u na matana e God pa e Karisito Iesu pa angelola ning e God ka aslang pas la, sur ur mur a asaerla ne, pa gong u rakrakai ka sur ning a ris pa ning a ris bel, pa gong u mang ka sur ning a ris pa ning a ris bel.

22 Gong u suah kapit naur a kum saot on tik pa u angisngisi sur a titol anuna Leklek. Pa gong u mur a taraila ana toltol laulau. Ur tai alar anum a lalaun sur ir totoh.

23 Gong u gang ka a malum, ur gang otleng al siklik wain sur ir nangan a balam, pa ir kepsen a tinsaman ning u sami.

24 A toltol laulau anuna dingla na tarai dir oroi lalan nigoni ana pukakiar ning di warkurai la onoi. Ika toltol laulau anuna dingla na tarai otleng bel tik ir oroi lalan kapiti, lamur dir oroi lalani.

25 Mang otleng larning, ana wakak a titol. A wakak a titolla anuna dingla na tarai ka hanot

talapor. Ika a titolla ana dingla na tarai otleng bel dir oroi lalani onone, lamur dir oroi lalani.

## 6

### *A asaer tetek a tena titol orosla*

<sup>1</sup> A tena titol orosla lar hanrawai anunla ningnigola, sur gong tik i atong laulau a risana e God pa anundala asaer.

<sup>2</sup> Pa la ning anunla ningnigo na tena tortorot, gong la tabun longor teteki, anasa lar nuki mang la tas ka ana tortorot. Lar longlongor wakak teteki, anasa la titol ot tetek a tena tortorot, ning la mang suri. Ur asaer la pa ur arakrakai la ana asaerla ne.

### *A nuknuk sur a mani pa keskes na leklek*

<sup>3</sup> Ning tik ir asaer a tarai ana ta asaer masik ning bel i arlar ana asaer momol ana nundala Leklek e Iesu Karisito, pa bel i arlar ana asaer ning e God i mang suri,

<sup>4</sup> a ngas a barsan ning, i aitna pas i ot, pa bel i tasman ta utna. Anuna laulau a nuknuk sur a arlak pa harum na warwara i arlar ana tinsaman teteki. Naur a toltol ne i tol otnan a toltolla ne: a ram, a taptapagal, a arle, a nuknuk laulau ana taraila.

<sup>5</sup> A nuknukinla i loklokron pa la balakut artalai tetek la, pa momolna i rop oros kusun la. La nuki mang ning lar mur a toltol ning e God i mang suri, a toltol ne ir tol otnan a mani ning lar kibasi.

<sup>6</sup> Ika ning tik ir mur a toltol ning e God i mang suri taum ana balmolmol, a toltol ning, a momol a gongon.

<sup>7</sup> Ning di agon pas dala, bel dala los otnan ta utna ute na rakrakan hanua, pa ning dalar ulak, bel dalar los otleng ta utna mite.

<sup>8</sup> Ning a utna na hangan andalai pa nundala a kaenla otleng ir kes, asaning dalar nuknuk ulak suri? Dalar balmolmol ka.

<sup>9</sup> La ning la mang sur a tnan mani, lar punga ana arlam, pa lar hirua ana kun ana longlong a nuknuk pa nuknuk sur a utna ning ir alaulau la. Ir alaulau la pa ir kamar la.

<sup>10</sup> Anasa a nuknuk sur a mani, a kama urmatana toltol laulau. Pa dingla na tarai ning la nuknuk kol suri, la ka han masik kusun a tortorot, pa la alaulau anunla lalaun ana galis a mamahat.

### *E Pol i arakrakai e Timoti ana titol na lotu*

<sup>11</sup> Ika, u Timoti, a barsan ane God, ur han masik kusun a ututnala ne. Ur rakrakai sur mur a tostos a toltol, a toltol ning e God i mang suri, a tortorot momol, a marmaris, a tuntunur rakrakai pa a molmol a toltol.

<sup>12</sup> Ur tur rakrakai ana tortorot arlar ana wakak a tena harum. Pa ur tong akes a lalaun tikin sur anumi, asaning e God i kabah pas u suri, ning u warwara talapor ana tortorot anumi na matana galis a tarai.

---

**6:6:** **6:6** 1 Timoti 4:8; Pilipai 4:11-12; Hibrú 13:5      **6:7:** **6:7** Jop 1:21      **6:10:** **6:10** Epeses 5:5      **6:11:** **6:11** 2 Timoti 2:22      **6:12:** **6:12** 1 Korin 9:25-26; 2 Timoti 4:7

<sup>13</sup> A warwara tetek u na matana e God, esaning i saran a lalaun tana ututnala rop, pa na matana e Karisito Iesu ning i warwara talapor ono i ot lanigo ta e Pontius Pailat. A atongi tam mange:

<sup>14</sup> Ur mur a warwara ne, sur gong ta rongo pa ta artitiu ir kibas u. Ur toli tuk ana pukakiar ning anundala Leklek e Iesu Karisito ir ulak.

<sup>15</sup> Ning a taim ir sot, e God ot ir sune ulak seni. E God sot ka a tnan Tena Warkurai pa i angis tikin, a King anuna kingla, pa Leklek anuna leklekla.

<sup>16</sup> Anunai ka a lalaun tikin, pa i kes ting na tnan talapor ning bel tik ir han milau. Belot tik i oroi tari pa bel tik ir oroi lar pasi. Dir saran tar a tnan hanrawai teteki, pa i tong akes a tnan rakrakai ning ir kes tikin. Amen.

<sup>17</sup> Ur atumarang la ning la tong akes a galis a ututnala te na rakrakan hanua sur gong la aleklek pas la ot. Pa gong la tortorot ana mani ning ir rarop ka. Lar tortorot ka oe God, esaning i tabar dala ana wakak a ututnala rop sur dalar gas onoi.

<sup>18</sup> Ur atai la sur lar tol a wakakna, pa lar bukus ana wakak a titol. Lar sira artabar pa lar asalar al utna otleng tetek al tarai.

<sup>19</sup> Ning lar toli larne, lar tong akes a gongon momol. I ning, a wakak a kamkama nunla lalaun lamur, sur lar kibas pas a lalaun ning a lalaun momol.

<sup>20</sup> Timoti, ur tai alar wakak a titol ning e God i saran tari tam. Ur han masak kusun la ning la

atong a warwarala oros ka ning bel i arlar ana nuknuk e God. Pa ur han masik otleng kusun la ning la arlak ana utna ning la atongi mang “a tastasman”, ika bel a tastasman momol.

<sup>21</sup> Dingla na tarai la atongi mang la tortorot ot ana tastasman ning, pa la ka han masik kusun a tortorot oe Iesu.

A marmaris ane God ir kes tetek mulo.

**A Wakak a Warwara ane God**  
**The New Testament in the Label language of Papua**  
**New Guinea**

**Nupela Testamen long tokples Label long Niugini**

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

---

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94